



**Сотиболди Раҳимов
(1943-2017)**

Андижон давлат университети Чет тиллар факультетининг асосчиларидан бири, жонкуяр устоз, инглиз тили фонетикаси кафедраси мудири, филология фанлари доктори, профессор, Халқаро антик дунё илмий академиясининг академиги Сотиболди Раҳимовдан жудо бўлдик. Сотиболди Раҳимов нафақат Андижон давлат университети, балки Республикамиз филология фани ривожланишига катта ҳисса қўшган олим эди. У киши Андижон давлат педагогика тиллар институти ташкил қилинган даврдан бошлаб турли лавозимларда фаолият кўрсатиб, минглаб шогирдларга устозлик қилди. Ушбу инсоннинг номи қалбларда мангу яшайди. Бу жудоликдан нафақат Андижон давлат университети профессор-ўқитувчилари, талабалари, балки у кишини билган, бу инсон ҳақида эшитган барча инсонлар чуқур қайғуда. Устоз ҳаёти давомида кўплаб савоб амалларни амалга оширган, имкони борича ҳар бир кишини қўллаб-қувватлаб, ўзининг қимматли маслаҳатларини аямайдиган инсон эди. Кўплаб фан докторлари, фан номзодлари, магистрлар ва бакалавр мутахассисларига узтозлик қилган мазмунли умр эгаси эди. Домланинг дўстлари, шогирдларининг бу зотнинг охирати обод бўлишига ишончи комил!

Сотиболди Раҳимович Раҳимов 1943 йил Асака туманининг Файзиобод қишлоғида таваллуд топган. У 1960-1965 йилларда Тошкент чет тиллар педагогика институтида таҳсил олган. 1965-1968 йилларда Андижон давлат тиллар педагогика институти инглиз тили кафедраси ўқитувчиси, 1968-1970 йиллари Москва давлат чет тиллар институти стажёр-тадқиқотчиси, 1970-1973 йиллари шу институтнинг аспиранти, 1973-1974 йиллари Андижон давлат тиллар педагогика институти инглиз тили кафедраси катта ўқитувчиси, 1973-1977 йиллари чет тиллар факультети декани, 1977-1983 йиллари инглиз тили лексикаси ва стилистикаси кафедраси мудири, доценти, 1983-1985 йиллари Москва тилшунослик институти докторанти, 1985-1991 йиллари инглиз тили лексикаси ва стилистикаси кафедраси мудири, 1991-2010 йиллари эса инглиз тили лексикаси ва стилистикаси кафедраси мудири, профессори каби масъулиятли лавозимларда фаолият олиб борган. Домла ҳозирга қадар Андижон давлат университети инглиз тили фонетикаси кафедраси мудири лавозимида ишлаб келаётган эдилар.

С.Р.Раҳимов 1974 йилда Москва давлат чет тиллар институтида филология фанлари доктори, проф. Н.А.Слюсарева раҳбарлигида “Инкорлик категориясининг тил тизимида тутган ўрни” мавзусидаги номзодлик диссертациясини ҳимоя қилди.

Тинмай илмий изланишлари натижалари ўларок, 1983-1985 йилларда С.Р.Раҳимов Москва тилшунослик институтида докторантурани ўтаб, 1990 йили Москва давлат ҳарбий чет тиллар институтида “Дейксис как объект исследования сопоставительной лингвистики” мавзусидаги докторлик диссертациясини ҳимоя қилди.



У республика илмий ҳаётида фаол иштирок этиб, 2 та монография, 4 та ўқув қўлланма, 2 та луғат, 5 та услубий қўлланма, 300 дан ортиқ тезис ва илмий мақолалар муаллифидир, унинг раҳбарлигида 2 та номзодлик диссертацияси ҳимоя қилинди. Ҳозирги пайтда унинг шогирдлари тилшуносликнинг долзарб масалаларига оид турли мавзуларда илмий изланишлар олиб бормоқдалар. С.Р.Раҳимов Ўзбекистон Республикаси Президенти “Истеъдод” жамғармасининг “Устоз” унвонига сазовор бўлган. У бир неча йиллар давомида Ўзбекистон Жаҳон тиллар университети ҳамда Самарқандда чет тиллар институти қошидаги докторлик диссертацияларни ҳимоя қилишга ихтисослашган илмий кенгаш аъзоси сифатида фаолият кўрсатиб келган. Олим умри давомида фан номзодлигига даъвогарлик қилган кўплаб ёшларга ўз маслаҳатларини аямади, уларни қўллаб-қувватлади. Профессор С.Раҳимов Самарқанд давлат чет тиллар институти тасарруфида нашр қилинадиган “Хорижий филология” ва Жиззах шаҳрида чоп этиладиган “Антик дунё” журналлари таҳририяти аъзоси сифатида ҳам самарали фаолият юритиб келди.

Домланинг сиймоси ҳамкасблар, шогирдлар қалбида доимо сақланажак.

Ш.Сафаров, А.Маматқулов, Ғ.Мирсанов, В.Воситов